



*Minggu, 20 Mei 2021*

**Ogen: JAKUP 5:7-8**



**Ertima Alu Sabar**



**L**it sekalak perjuma si nuan gadung joler Cilembu. Biasa umur gadung enda 4-5 bulan ngenca nggo banci iperani ras idayaken. Sekali waktu, enggo seh umur gadung enda ndai, tapi la mejile ergana bas paksa e. Emaka itekadken perjuma e nahan gadung ndai seh erga gadung e nggo mejile. Tapi melala kel kalak si mentas-mentas ngerana "nggo kap metua gadungndu e, peranilah, pan menci kari, galangsa kari buahna, pan taneh kari gadungna, lanai bo kari lako," nina jelma ndai gelah mobah ukurna. Nimai-nimai gadung ndai rani, isuanna ka si nuan sideban. Saber ia nimai erga ndai, janah saber ia ngerawatca. Kenca menam 10 bulan nggo mejile erga ndai, iperanina, kilona pe tambah erga pe memuasken. Malem kel ate perjuma ndai.

Senina-turang enda ndai jadi gambaren adi saber kita ertima lit nge ulihna si mehuli man banta. Saja megati ertima bosan kel siakap. Perkara sitik nari kel gelah sialoken upah kesabaren e, je kita iuji iblis, minter kita mobah, medu ras nilah. Tentu la si dat kai pe arah la saber enda ndai. Kesabarenta ertima alu pengarapen mahanca kita megegeh.

I bas kitab Heber enda mpersingeti kalak musil siitindas kalak bayak gelah saber, reh pagi Tuhan peduakaliken kerina kecedan atena isalihken jadi keriahen. Sebab asa ibereken Tuhan nusur udan, em tanda Tuhan tetap mpekena-kena anak-anakNa. Bageme iarapken penalemen kalak si tek man keleng ate Tuhan. Emaka banci ikataken kesabaren nimai paksa Tuhan alu la jungut-jungut ras si salah-salahen em sikap pusuh si ngena ate Tuhan. Adi menang kita ngalaken perbeben alu kesabaren dungna bagi Job me kita, Tuhan ngkuhi keriahenna, ngulihkan erta-ertana janah ibabo si e banci ermegah Job nandangi iblis si nguji ia, maka Tuhan kap kemenangenna.